

SFS nr: 2009:600

Departtemntti/viranomhainen: **Kulttuurideparttemntti**

Otsikko: **Kielilaki** (2009:600)

Annettu: 2009-05-28

Lain sisältö ja tarkoitus

1 § Tässä laissa on määräyksiä ruottin kielestä, kansalisista minuriteettikielistä ja ruottin viittomakielestä.

Laissa on kans määräyksiä ytheiskunnan vastuusta siitä ette yksittäisele on kielet saatavilla ja kielenkäyttämistä niin julkisessa toiminassa ko kansvälisissä yhtheyksissä.

2 § Lain tarkoitus on määrätä ruottin ja muitten kielitten asema ja käyttö ruottalaisessa ytheiskunnassa. Lain tarkoitus on suojata ruottin kieltä ja kielelistä monipuolisuutta Ruottissa ja yksittäisen saatavuutta kiehlisiin.

3 § Jos jossaki muussa laissa eli asetuksessa (förordning) on joku määräys joka poikkeaa tästä laista, se määräys jällaa.

Ruottin kieli

4 § Ruottin kieli on pääkieli Ruottissa.

5 § Pääkielenä ruottin kieli on ytheiskunnan yhtheinen kieli, joka häätyy olla kaikitten Ruottissa asuvitten saatavilla ja jota häätyy pystyä käyttämhään kaikila ytheiskunta-alueilla.

6 § Ytheiskunnala on erityinen vastuu siitä ette ruottin kieltä käytethään ja kehitethään.

Kansalaiset minuriteettikieliset

7 § Kansalaiset minuriteettikieliset oon suomi, jiddisch, meänkieli, romani chib ja saamen kieli.

8 § Yhtheiskunnala oon erityinen vastuu siitä ette kansalaisia minuriteettikieliä suojathan ja eesautethaan.

Ruottin viittomakieli

9 § Yhtheiskunnala oon erityinen vastuu siitä ette ruottin viittomakieltä suojathan ja eesautethaan.

Kielenkäyttö julkisessa toiminassa

10 § Kieli tuomioistuimissa, hallintoviranomhaisitten ja muitten elimitten (organ) tykönä jokka toimiva julkisessa toiminassa oon ruotti.

Muussa laissa oon erityisiä määräyksiä oikeusta käyttää kansalaisia minuriteettikieliä ja muuta pohjosmaista kieltä.

Ko oon kyse tuomioistuimitten ja hallintoviranomhaisitten velvolisuudesta käyttää tulkkia ja kääntää asiapaperia, niistä oon erityisiä määräyksiä.

11 § Kieli julkisessa toiminassa pittää olla siisti (vårdat), yksinkertanen ja ymmärettävä.

12 § Viranomhaisilla oon erityinen vastuu siitä ette ruottin terminologiitä heän eri erikois-aloila oon saatavilla, ette sitä käytethään ja kehitethään.

Ruottin kieli kansanvälisissä yhteyksissä

13 § Ruottin kieli oon Ruottin viralinen kieli kansanvälisissä yhteyksissä.

Ruottin kielen asemaa viralisenna kielenä Euruupan unioonissa häätyy suojata.

Yksittäisen saatavuus kiehliin

14 § Jokhaiselle joka assuu Ruottissa häätyy antaa maholisuus oppia, kehittää ja käyttää ruottin kieltä. Sen lisäksi sille

1. joka kuuluu kansalisheen minuriteethiin häätyy antaa maholisuus oppia, kehittää ja käyttää minuriteettikieltä, ja

2. sille joka oon kuuro eli jolla oon kuulo-vamma ja sille jolla jostaki muusta syystä tarttee viittomakieltä, häätyy antaa maholisuus oppia, kehittää ja käyttää ruottin kielen viittomakieltä.

Sille, jolla oon joku muu äitinkieli ko mitä ensimmäisessä kappalheessa sanothaan, häätyy antaa maholisuus kehittää ja käyttää omaa äitinkieltä.

15 § Yhtheiskunnala oon vastuu siitä ette yksittäisele oon kieliä saatavilla 14 §:n mukhaan.